

KOROSA

Jesus hã h'yy ka'eeh do Korosa häd näng do panang
bã habong do hã Paw-Ro ma erih do hahÿÿh

Kedëng do ky n'aa hahÿÿh

1 Paw-Ro ÿ ti hÿÿh, P'op Hagä Do karën do hyb n'aa Kristo Jesus mejũũ do see hado däk doo. Ër hÿÿj hadoo do Tsimoot häd näng do daheeh ²ÿ edëng bëeh, wakãn haa hedoo doo, ãã nemuun Kristo hã h'yy kata padëek doo, tsyt hë P'op Hagä Do wë kasëew bong doo, ta hã h'yy kanerét doo, Korosa panang bã habong doo. ÿ karën P'op Hagä Do ër Yb ky enyym bë hã. ÿ karën baad ub bë tah'yyb en'yym.

³P'op Hagä Doo, Jesus Kristo ër Wahë N'aa Yb hã ãã ky n'aa etsëe bã bë hyb n'aa, ãã h'yy gadeja had'yyt hë ta wë bë hyb n'aa, ⁴Kristo Jesus hã bë h'yy kae däk ãã ky n'aa napäh do hyb n'aa, sahõnh hë ta hã h'yy ka'eeh do bë kamahãn ãã ky n'aa napäh do hyb n'aa na-ããj hë. ⁵Jesus hã bë wén h'yy ka'eeh, ta wób bë wén kamahãn, baad hadoo do ta jawén bë gadoo bë gada do hyb n'aa. Hÿ pong jé P'op Hagä Do enyww hõm tii, bë hã tabanoo hyb n'aa. Bë ky n'aa napëe däk hÿ pong jé ji gadoo do ky n'aa, baad hadoo do ky n'aa, Jesus Kristo ky n'aa hanäm doo ⁶bë wë takajaa noo gó. Badäk hahÿ haw'ããts hë ta ky n'aa hanäm do kah'ũũm. Jé pad'yyt hë panyyg ky dah'eeh do baad hadoo do hã tah'yyb wareem hõm tii. Tii da né hë na-ããj hë tabad'oo bë mahang, pooj jé ta ky n'aa bë maa napäh noo gó naa, ji wë P'op Hagä Do ky enyym do ky n'aa hã baad bë h'yy kadaw'uuh noo gó naa. ⁷Epararas, ãã sii Kristo wë moo wät doo, bë paa tama met'ëëg wät ta ti panyyg hanäm doo. Baad Epararas moo wät. Dooch tah'yy gajëe bã bë hyb n'aa Kristo wë tamoo wät do hã. ⁸ãã tamaher'oot nyy da ta wób bë kamahãn P'op Hagä Do Sahee an'oo bã.

Sa hyb n'aa Paw-Ro ky n'aa etsëe do ky n'aa hahÿÿh

⁹Ti hyb n'aa, bë ky n'aa ãã ky n'aa napäh bã, ãã du doo paa P'op Hagä Do hã ãã ky n'aa etsëe bë hyb n'aa. Dooch ãã eréd bã bë hyb n'aa ãã ky n'aa etsëe doo. ãã etsëe P'op Hagä Do hã ta Sahee hã hana do ji hapäh doo me, ta Sahee hã hana do ji h'yy ganäng doo me na-ããj hë bë tah'yy gan'yyh takarën do hã, baad bë bahapäh hyb n'aa. ¹⁰Tii d' ãã wén ky n'aa etsëe, Tak'ëp Hyb N'aa Jawyk Do

ta karapee hã takarën doo da né hẽ bë babok hyb n'aa, sahõnh hẽ bë moo bok do hã tah'yy gadajang hyb n'aa, sahõnh hẽ baad hadoo pé bë moo bok hyb n'aa had'yyt hẽ, baad P'op Hagä Do bë bahapäh hyb n'aa kä bë h'yyb gó. ¹¹ Äã ky n'aa etsëë na-ääj hẽ, tak'ëp ta kabaj'aa do hejój me bë tah'yyb hej'oonh hyb n'aa, bë h'yy gejë hõm mahãnh ta hã, bë h'yyb jawyk hyb n'aa, tsebee gó sahõnh hẽ bë gadoo hyb n'aa, ¹² ër Yb hỹ pong jé hawät do wë bë h'yy gadajang hyb n'aa. Ti né hẽ ti ta karapee sa sii bë gadoo tan'oo bä ji hã taky n'aa enooh doo, hỹ pong jé ta bag bawät bä ji gadoo do pan'aa. ¹³ Ër ted'ëëp Nesaa Do Yb moo gó naa, badagyp hadoo do bag'ääs doo. Ta T'aah takamahãnh do ër hã tabagãã kãn, P'op Hagä Do an'oo bä kä. ¹⁴ Ta T'aah hyb n'aa ër tabedëëb kãn. Ta hyb n'aa kawug hõm nesaa do ër moo bok doo kä.

Kristo sahõnh hẽ sa bahãnh ky n'aa hahỹyh

¹⁵ Ta T'aah gó kametä däk P'op Hagä Do ji nahapäh doo. P'op Hagä Do hadoo né hẽ tii. Sahõnh hẽ kapahuuj däk do pooj jé tawäd né hẽ. Sahõnh hẽ kapahuuj däk do bahãnh tanu gadäk. ¹⁶ Ti né hẽ tii, sahõnh hẽ hỹ pong jé hanäng doo, hỹ pong jé habok doo, badäk hahỹyh bä hanäng doo, badäk hahỹyh bä habok do na-ääj hẽ pahuuj wät doo. Ji hapäh doo, ji nahapäh do na-ääj hẽ tapehuuj bong, wë hã bag'ääs do ji nahapäh do rado bä, kabaj'aa do ji nahapäh do rado bä, mejüü do ji nahapäh do rado bä, hyb n'aa jewyk do ji nahapäh do rado bä na-ääj hẽ. Ti né hẽ sahõnh hẽ pehuuj bong doo. Ta hyb n'aa né hẽ sahõnh hẽ tapahuuj wät doo. ¹⁷ Sahõnh hẽ pooj jé tawäd né hẽ. Ta hyb n'aa né hẽ sahõnh hẽ tapahuuj wät do baad tawén hadoo. ¹⁸ Ta hã h'yy ka'eeh doo, ta hub, ta mooh, ta tsyym hedoo doo, sa nu gabóg tii. Ti né hẽ sahõnh hẽ ta hã h'yy ka'eeh do du na doo. Ti né hẽ jããm hẽ pooj jé dejëp do mahang ganä wät doo,^a sahõnh hẽ sa bahãnh hyb n'aa jawyk tabahadoo hyb n'aa. ¹⁹ Tii d' tawén hadoo, ta da had'op ta T'aah bahadoo P'op Hagä Do karën do hyb n'aa. ²⁰ P'op Hagä Do karën na-ääj hẽ, ta T'aah hyb n'aa, sahõnh hẽ badäk hahỹyh bä hanäng doo, badäk hahỹyh bä habong doo, hỹ pong jé hanäng do na-ääj hẽ baad tabahadoo p'aa hënh ta wë, baad ub p'aa hënh sahõnh hẽ rababok hyb n'aa ta wë kä. Ta najiis rabahado padëëk

^a 1.18 Jesus ganä wät do pooj jé ta wób ragenä boo né paawä, p'aa hënh radejëp. Jããm pooj jé Kristo dejëp do mahang ganä wät doo, nadajëb wät doo.

tan'oo bā^b ta T'aah majyyw hyb n'aa, b'aa kajatsëk do hã tadajëp do hyb n'aa.

²¹ Bëë kã, dawëë bë babok paa P'op Hagã Do mahãnh Kristo hã bë h'yy kana'eeh nã noo gó. P'op Hagã Do majiĩ paa bëeh, bë h'yyb gó, nesaa do bë moo bok do hyb n'aa paah. ²² Ti hadoo né hë, hÿÿ kã ta najiis bë bahado däk tan'oo bã Kristo, aj'yy gó ewäd hyng do bë hyb n'aa dajëp do hyb n'aa. Ta najiis bë bahado däk tan'oo bã. Tii d' tawén d'oo, tsyt hë ta wë bë babok hyb n'aa, baad had'op bë bahadoo hyb n'aa ta matym gó, dooh bë rap'ãã ky n'aa tapaa pé hyb n'aa ta matym gó. ²³ Baad bë h'yy kae had'yyt bã tii. Baad bë gahëen bã had'yyt hë panyyg hanãm do hã bë hã P'op Hagã Do ky n'aa eno däk doo. Ti né ti ta panyyg, Jesus ky n'aa, bë maa napëë wät doo, badäk hahÿ haw'ããts rapanäg hõm doo. Ta ti panäg n'aa see hado däk ÿ ti hÿ Paw-Ro.

Kristo hã h'yy ka'eeh do sa hyb n'aa Paw-Ro ahoop do ky n'aa hahÿÿh

²⁴ ÿ tsebé da hë ÿ radawäts gëët doo bã, baad tabahadoo hyb n'aa bë hã ÿ ahoop doo. ÿ karën ÿ bahajaa Kristo hã ÿ tan'oo däk doo, ta hã h'yy ka'eeh do sa hyb n'aa, ta hub, ta mooh, ta tsyym hedoo do sa hyb n'aa ÿ ahoop do pan'aa. ²⁵ Kristo hã h'yy ka'eeh do sa masa n'aa ÿ bahado däk, hã ÿ P'op Hagã Do banoo do hyb n'aa baad ub sahõnh hë ta kyyh bë hã ÿ ma metëek hyb n'aa. ²⁶ Hã ÿ tabanoo tah'yyb däng doo, nyy d' tabad'oo ji hã, ÿ ma metëek hyb n'aa. Kristo ewäd hyng do pooj jé dooh ji hapëë nã bã ta h'yyb däng doo. Dooh P'op Hagã Do h'yyb däng do kametã nã bã ti noo gó ér wahë maküũ hã. Ta karapee hã hÿÿ kã takametã wät. ²⁷ P'op Hagã Do h'yyb däng ta karapee hã tametëeh tak'ëp baad hadoo do sahõnh hë Judah buuj nadoo do wë hÿÿ kã tamoo wät doo. Hahÿÿ da ta ti tak'ëp baad hadoo do ta h'yyb däng doo: Bë h'yyb gó, ta hã h'yy ka'eeh do h'yyb gó Kristo bawäd däk, Judah buuj nadoo do né paawã bëeh! Ti hyb n'aa bë né da gadoo tak'ëp baad hadoo do hÿ pong jé.

²⁸ Kristo ky n'aa ãã panäk. Sahõnh hã ãã maher'oot tak'ëp péj baad raky daheeh hyb n'aa. Tak'ëp hajaa doo me sahõnh hë sa hã ãã ma metëek. Tii d' ãã wén d'oo, Kristo hã h'yy kata däk do baad had'op rabahado padëek P'op Hagã Do matym gó ãã karën do hyb n'aa.

^b 1.20 Ta T'aah hã h'yy ka'eeh do tii.

²⁹Tii d' āā karēn do hyb n'aa, tak'ēp had'yyt hē ŷ hyb n'aa tam'aah, Kristo hejój me hēp ŷŷ gó baad hawät doo me.

2 ŷ karēn bē bahapäh nyy da tak'ēp ŷ ky n'aa etsēē, tak'ēp ŷ hyb n'aa tam'aah bē hyb n'aa, Raw-Diseej panang buuj sa hyb n'aa na-āāj hē, jé Jesus hā h'yy ka'eeh do ŷ ranahapäh do wób sa hyb n'aa na-āāj hē. ²Tii d' ŷ wén d'oo, ŷ karēn rah'yy kej'oonh. ŷ karēn kamahññ gó séd rah'yib hedoo. Tii d' ŷ wén d'oo na-āāj hē, baad rah'yy kadaw'uuh hyb n'aa pooj jé ji nahapäh do P'op Hagä Do h'yib däng do hä. ŷ karēn baad rabahapäh ta tii. Baad ŷ karēn Kristo rabahapäh, ŷ hanäng doo. ³Sahõnh hē P'op Hagä Do hā ji hapäh doo, baad ta hā ji h'yy ganäng doo, jããm hē Kristo hā ji baw'yyt. ⁴Ta ti bē ŷ wén maher'oot, sa kyyh baad ji ed'oo doo me bē rawad'ii mahññh. ⁵ŷ nawäd né paawä bē mahang, ŷ hyb n'aa newëē do bē mahang tabawät. ŷ tsebé baad ub bē babok ŷ ky n'aa napäh do hyb n'aa. Séd h'yib hedoo mä bëēh. ŷ tsebé na-āāj hē dooh né hē bē h'yy gejë hõm Kristo hā bē h'yy ka'eeh do hā ŷ ky n'aa napäh doo.

Ji bawät do papuuj ky n'aa hahÿÿh

⁶Ti hyb n'aa kä, Kristo Jesus bē gado däk do hyb n'aa bē wahë n'aa tabahadoo hyb n'aa, taw'ãäts hē bē awäd had'yyt hē ta hā h'yy kata däk do rababok doo da. ⁷Baad né hē bē h'yy kata däk Jesus hā joom kóm baad joom tamasoo do hadoo. Taw'ãäts hē bē an'oo bē h'yib gó Jesus bawät do takahũũm magyys hē. Taw'ãäts hē bē an'oo baad bē h'yy kae had'yyt hē baad hadoo do ky n'aa hā bē rama met'ëëg wät doo da né hē. Taw'ãäts hē tak'ēp bē h'yy gadeja had'yyt hē P'op Hagä Do wë, bē hā tanoo do hyb n'aa.

⁸Bē hyb n'aa matakä ta s'ee hēnh bē rah'yib mahũũm mahññh rama metëëk doo me. Baad ji edoo né paawä rahyb n'aa newëē doo, rama metëëk doo, daap hē ti ta tii. Ji rawedii ta tii hā. Sa wahë makū ma mehetëk doo gó rabe'hũũm rama metëëk doo. Badäk hahÿÿ hā, nyy da ji bad'oo, nyy da ji bawät do ky n'aa jaw'yik doo gó rabe'hũũm rama metëëk doo. Dooh Kristo hanaa tado bä ta tii. ⁹P'op Hagä Do had'op do Kristo, aj'yy tabahado däk doo. ¹⁰Hÿÿ kä, Kristo hā bē h'yy kata däk do hyb n'aa, ti anyy däk bē h'yib gó sahõnh hē P'op Hagä Do karēn doo. Sahõnh hē kabaj'aa do ji nahapäh doo, hyb n'aa jeyyk do ji nahapäh do na-āāj hē sa bahññh ti Kristo. ¹¹Judah buuj ajyy sa masuuj noo byyh rageshõk P'op Hagä Do karapee rabahado padëëk do metëë n'aa.

Kristo hã bẽ h'yy kata dāk do hyb n'aa bẽ hã na-ãāj hẽ ti anyy dāk ta metëe n'aa hadoo. Sa mo haj'aa nado tii. Kristo ado hõm nesaa do ji h'yyb sãg karẽn doo. Ti né tametëe n'aa hadoo bẽ hã hanãng doo. ¹²Bẽ nu kemuun bong bã bẽ radakã jẽng hadoo Kristo sii. Bẽ genã bong do hadoo Kristo sii p'aa hẽnh bẽ nu gawëej dāk doo. Ta tii d' tawén hadoo P'op Hagã Do hejój hã, Kristo ganã wät hanoo do hã bẽ h'yy ka'eeh do hyb n'aa. ¹³P'ooj ub, nesaa do bẽ moo heb'ooh do hyb n'aa, nesaa do bẽ h'yyb karẽn do kanado hõm do hyb n'aa na-ãāj hẽ, dejep do hadoo bẽ h'yyb tym P'op Hagã Do hã. Tii bã kã, Kristo sii bẽ ganã wät hadoo P'op Hagã Do an'oo bã. Sahõnh hẽ nesaa do ẽr moo wät do tamabaan hõm ẽr hã kã. ¹⁴P'op Hagã Do awug hõm ẽr kũüt heen n'aa kerih do hadoo doo, nesaa do wẽ ẽr taky n'aa etyy do paah. Hahỹỹ da tabawug hõm: Tado dāk ẽr kũüt heen n'aa, tii bã tabepëem dāk hadoo b'aa kajatsëk do hã. Jesus dajep do hyb n'aa dajep hỹỹ kã ẽr kũüt ẽr hã ky n'aa ketyy do paah. ¹⁵P'op Hagã Do ado hõm sahõnh hẽ nesaa do kabaj'aa do ji nahapäh doo, nesaa do hyb n'aa jewyk do ji nahapäh do sa hejój. B'aa kajatsëk do hã Kristo dajep doo me P'op Hagã Do j'aa ketsëe dāk sa hã. Kristo dajep noo gó sahõnh hẽ sa matym gó P'op Hagã Do metã wät hadoo ta majiĩ, sa hã taj'aa ketsëe dāk do rabahapäh hyb n'aa.^c

¹⁶Ti hyb n'aa bẽ maa newë manã bẽ raky n'aa tapa bã bẽ awa do hã, bẽ eëek do hã,^d rabahed'oo doo da bẽ nad'oo hyb n'aa. Bẽ maa newë manã na-ãāj hẽ bẽ raky n'aa tapa bã sët ta baab ken'yyh rataheb'ëes doo, kamarab papuuj rataheb'ëes doo, Saab rataheb'ëes do na-ãāj hẽ bẽ natabëj bã. ¹⁷Jããm hẽ ta pooj jé hawät do metëe n'aa ti ta ti Judah buuj rataheb'ëes doo, ratayy doo. Kristo kajaa do pooj jé heen n'aa tii. Sahõnh hẽ ta ti kaja dāk Kristo hã, ti hyb n'aa dooh hyb n'aa ta ti ji karẽn wät péh. ¹⁸Bẽ maa newë manã bẽ raky n'aa ety bã j'ooj madäk doo me rakadad'uu gen'aak do hã, ããs raweh'ëeh gen'aak do hã. S'ëe gó rameboon do hyb n'aa hyb n'aa jewyk mäh, sa nooh. Rahyb n'aa newëe do hã, sa hanaa hẽ rakasab'ee. ¹⁹Ta ti hedoo doo, dawëe rababoo däg kãn,

^c **2.15** Tii da né hẽ Roma buuj rabad'oo sa majiĩ hã. Sahõnh hẽ sa matym gó rametëeh sa majiĩ, sa hã raj'aa ketsëe dāk sahõnh hẽ rabahapäh hyb n'aa. Ta ti ky n'aa gó Paw-Ro beh'uum Nesaa Do Yb hã, Nesaa Do Yb kabaj'aa do hã, P'op Hagã Do j'aa ketsëe dāk do ky n'aa.

^d **2.16** Tii d' Paw-Ro wén her'oot, ma matëg oow rama metëek do hyb n'aa. Sa noo ji tayy ji awa doo, ji eëek doo, baad ji P'op Hagã Do gadoo hyb n'aa. Dooh hyb n'aa pé ji tayy péh. Kristo dajep do hyb n'aa P'op Hagã Do ji tawén gadoo, ji tayy do hyb n'aa nado. Dooh jarakë hedoo do ky n'aa tado bã hahỹyh. Panyyq bód see hã ji tamaher'oot jarakë hedoo do ky n'aa.

Kristo, ër nu gabóg mahãnh. Dooh rah'yy kata wäd bä ër nu gabóg hã. Kristo hã h'yy ka'eeh doo, ta hã h'yy kata däk doo, sa h'yyb rahej'oonh, rahũum had'yyt hẽ rah'yy ka'eeh doo, raky dahé magyys hẽ na-ããj hẽ Kristo an'oo bä P'op Hagä Do karën doo da. Ji nu gabóg hẽnh hanaa ji jarãã sahõnh hẽ ji hã masoo doo. Tii d' Kristo bad'oo ta hã h'yy ka'eeh do hã. Ta hã h'yy ka'eeh do tabaa g'ããs, ta hã rakata däk tan'oo bä.

²⁰ Kristo hã bẽ h'yy kata däk do hyb n'aa, bẽ na-ããj hẽ bẽ dejeb bong hadoo pooj jé ji bawät do hã. Ti hyb n'aa, h'ëed hyb n'aa badäk hahỹỹ hã habong do Kristo nahapäh do rababok doo da bẽ babok nä? Hëd n'aa bẽ gadoo raky n'aa jaw'yyk do mejũũ doo? ²¹ “Bẽ ado manäh! Bẽ awa manäh! Bẽ moo dëe manäh!”, näng raky n'aa jaw'yyk doo. ²² Gawatsik do hã, hahãnh do hã ji tamejũũ do tii. Sa hanaa ta ti ji ramejũũ doo, ji hã rama metëek doo. Dooh P'op Hagä Do hanaa tado bä. ²³ Tak'ëp hajaa do ky n'aa jew'yyk do ji ed'oo ta tii. Ji daaj hẽ P'op Hagä Do ji weh'ëeh ji karën ta ti hedoo do ky n'aa jew'yyk do an'oo bä. Ji daaj hẽ ji kadaduu tan'oo bä. Ji daaj hẽ ji karehejãã tan'oo bä ta tii. Baad né paawä ta mahang ramoo bok doo, ti hyb n'aa baad ji hyb n'aa manatakä bä, baad ub ji ed'oo ji hã ramejũũ doo. Ti hadoo né hẽ nahejooj ta ti hedoo do ky n'aa jew'yyk doo. Dooh tahaja bä nesaa do ji h'yyb säg karën do hã ji h'yy keba bä tan'oo bä.

Taw'ãäts hẽ hỹ pong jé hanäng do hã ji h'yyb däk do ky n'aa hahỹỹh
3 Kristo sii bẽ ganä wät hadoo do hyb n'aa, h'yyb tym papuuj P'op Hagä Do hã hana do bẽ gado däk do hyb n'aa y hanäng péh, taw'ãäts hẽ hỹ pong jé hanäng do hã bẽ h'yyb padäg, P'op Hagä Do hub hadäk hẽnh Kristo basooh bä. ² Taw'ãäts hẽ hỹ pong jé hanäng do hã bẽ h'yyb padäg, badäk hahỹỹ bä hanäng do hã nado. ³ Taw'ãäts hẽ tii da bẽ bad'oo bẽ dajëp paa hadoo do hyb n'aa. Bẽ h'yyb papuuj tenyyw däk hỹỹ kä Kristo sii P'op Hagä Do wë kä. Dooh ta wób rahapëe nä bä ta ti bẽ h'yyb papuuj. ⁴ Kristo, bẽ h'yyb papuuj han'oo däk do matëeh bä kä, sahõnh hẽ sa matym gó ta sii bẽ kametä däk tii bä. Kristo kabaj'aa doo da bẽ da kabaj'aa na-ããj hẽ ti noo gó kä.

⁵ Ti hyb n'aa, taw'ãäts hẽ bẽ gawats'iik sahõnh hẽ baad nadoo do badäk hahỹỹ hã ji h'yyb säg karën doo. Bẽ aã manä bẽ yym nadoo do sii, bẽ patug nadoo do sii. Bẽ moo boo manä nesaa do nu meby n'aa näng do bẽ hã hanäng doo me. Taw'ãäts hẽ bẽ gawats'iik ta

wób hedoo pé nesaa do ji h'yyb säg karēn doo. Bē hyb n'aa hūūm manā bē ma. Jé ta ma hā hyb n'aa h'ūūm doo, ta ma hā tah'yy ka'eeh tii, dooh P'op Hagä Do hā tah'yy kae bā. ⁶Ta ti hedoo do hyb n'aa né hē P'op Hagä Do rejāā da nabuj keh'ūūm doo. ⁷P'ooj ub, Kristo bē nahapäh nä bā, tii d' paa bē babok. ⁸Hÿÿ kä, taw'ääts hē bē eréd hōm sahōnh hē hahÿ hedoo doo: Ji kawajāān doo, ji h'yy ganapūū doo, sahōnh hē ji da hadoo ji pan'aa takyyk doo, ta see ji ky n'aa rejāā doo, baad nadoo do ji er'oot do na-āāj hē. Taw'ääts hē bē eréd hōm né hē tii. ⁹Daap bē menā manā bē da hadoo do hā, bē eréd hōm do hyb n'aa bē h'yyb säg baad nadoo do ji moo wät hanoo doo. ¹⁰Bē h'yyb tym papuuj bē tah'yyb mahūūm hÿÿ kä. P'op Hagä Do mo haj'aa ta ti er h'yyb tym papuuj. P'op Hagä Do ah'ÿÿt er h'yyb tym papuuj, ta da hado had'yyt hē tabahadoo hyb n'aa kä, baad P'op Hagä Do er bahapäh hyb n'aa na-āāj hē. ¹¹Papuuj er P'op Hagä Do mo haj'aa do hyb n'aa, séd gó P'op Hagä Do ji tagadoo, Judah buuj ji do bā, Judah buuj nadoo do ji do bā, masuuj noo byyh kahōk do see ji do bā, masuuj noo byyh kanehōk do see ji do bā, ta see buuj ji do bā, ma kamanetēēk do ji do bā, ta see karom ji do bā, sa karom ji nado bā na-āāj hē. Sahōnh hē er h'yyb tym gó Kristo bawät. Sahōnh hē bahānh hadoo do tii.

¹²Ti hyb n'aa, P'op Hagä Do karapee, tsyt hē ta wē kasēew bong do bē bahadoo do hyb n'aa, tak'ēp bē takamahān do hyb n'aa, taw'ääts hē bē t'yyd mehīn bē da hadoo doo. Taw'ääts hē bē ky ennym ta wób sa wē. Taw'ääts hē dooh né hē bē h'yy kasabé bā. Taw'ääts hē kaja hē denaa hē bē h'yyb bē mahūūm ta wób sa wē. Taw'ääts hē h'yyb jawyg gó bē gadoo sahōnh hē. ¹³Taw'ääts hē kamahān gó bē gadoo ta wób ramoo boo né paawā bē hā bē ganen'aak doo. Taw'ääts hē bē mabaan hōm baad nadoo do ta wób bē hā rabad'oo doo, nesaa do bē moo bok do paa Tak'ēp Hyb N'aa Jawyk Do mabaan hōm doo da né hē bē hā. ¹⁴Taw'ääts hē bē kamahān bē da hadoo doo, sahōnh hē mahānh. Baad ub séd ji h'yyb hedo dāk ji kamahān do an'oo bā.

¹⁵Bē an'oo h'yyb n'yyym doo, Kristo bē hā han'oo dāk doo, bē tah'yyb mahūūm sahōnh hā, P'op Hagä Do bē tatsyyd wät do hyb n'aa h'yyb nyyw gó bē babok hyb n'aa. Kristo karapee séd h'yyb hedoo do takarēn bē bahadoo. Taw'ääts hē bē h'yy gadeja P'op Hagä Do wē. ¹⁶Bē an'oo bē h'yyb gó baad ub sahōnh hē Kristo ky n'aa bawät, bē an'oo bē tah'yyb mahūūm. Taw'ääts hē tak'ēp

h'yy ganäng doo me bë ma metëek ta ky n'aa bë da hadoo do hä. Taw'ääts hë tak'ëp h'yy ganäng doo me tak'ëp péj bë maher'ood na-ääj hë bë da hadoo doo, baad raky daheeh hyb n'aa. Taw'ääts hë Saaw-Mo hä hanäng do kejäm do ky n'aa, ta see pé P'op Hagä Do ji ma ejäm do ky n'aa na-ääj hë bë ma ejäm. Taw'ääts hë h'yy gadajaa gó bë ma ejäm P'op Hagä Doo. ¹⁷Sahõnh hë bë moo bok doo, sahõnh hë bë her'oot do na-ääj hë, taw'ääts hë Jesus, Tak'ëp Hyb N'aa Jawyk do ky gabuuj gó bë bad'oo. Jesus ër taky masa ta Yb wë. Ti hyb n'aa taw'ääts hë bë j'aa etsë né hë P'op Hagä Doo, ër Yb, bë hä tanoo do hyb n'aa.

ÿyj hä, ajyy hä, karapee hä na-ääj hë tamaher'oot do ky n'aa hahÿyh
¹⁸ÿyj, taw'ääts hë bë ky dahé had'yyt hë bë patug. Tii d' né da taw'ääts hë bë bahed'oo bë h'yy kata däk do hyb n'aa Tak'ëp Hyb N'aa Jawyk Do hä. ¹⁹Ajyy, taw'ääts hë bë kamahãhã had'yyt hë bë äj. Bë ejäg manä bë äj. ²⁰Karapee, pahëew, maruus, taw'ääts hë sahõnh hë bë ky daheeh bë yb, bë ÿyn, Tak'ëp Hyb N'aa Jawyk Do tsebé do hyb n'aa bë ky dahé bä. ²¹Bë sa yb, bë ejäg had'yyt manä bë taah, rah'yy geëj mahãnh bë wë. Tii d' bë adoo bä, dooh rah'yb hedo boo baad hadoo do ramoo bok do hä.

Sa karom hä tamaher'oot do ky n'aa hahÿyh

²²Bëeh, sa karom, taw'ääts hë bë ky dahé had'yyt hë bë kariw n'aa. Bë moo bok do rahegãã bä had'yyt nado bë ky daheeh, bë hä raj'aa etsë bë karën do hyb n'aa. Taw'ääts hë bë h'yrb gó naa bë ky daheeh sa hä, j'ooj madäk doo me nado. Tak'ëp Hyb N'aa Jawyk Do bë weh'ëeh do hyb n'aa, taw'ääts hë baad bë moo bok sa wë. ²³Taw'ääts hë t'öp, bë h'yrb gó naa bë moo bok sahõnh hë. Taw'ääts hë Tak'ëp Hyb N'aa Jawyk Do wë bë moo bok ta ti bë h'yrb gó, ajyy wë had'yyt nado, ²⁴ta hä naa bë gadoo da baad hadoo do bë moo bok do mabaj bë bahapäh do hyb n'aa. Tak'ëp Hyb N'aa Jawyk Do wë né hë, Kristo wë né ti bë moo bok doo. ²⁵Hÿÿ kä, baad nadoo do moo wät do gadoo né da nesaa do tamoo wäd wät do säm. Tii d' tawén hadoo, dooh P'op Hagä Do asëew bã ji mahang.

4 Bëeh, sa kariw n'aa hedoo doo, taw'ääts hë baad bë bad'oo bë karom hä, baad bë an'oo na-ääj hë sa hä. Bë wad'ii manäh. Bë na-ääj né hë bë Kariw N'aa näng hÿ pong jé kä. Bë hyb n'aa newë tii. Taw'ääts hë bë karom hä bë bad'oo, bë kariw n'aa hÿ pong jé hawät do bë hä tabad'oo doo da.

Nyy da raky n'aa etsëe doo, nyy da rababok do ky n'aa hahÿyÿh

²Bë h'yy gejë hõm manä P'op Hagä Do sii bë er'oot do hä. Bë hyb n'aa matakä had'yyt hë bë ky n'aa etsëe bä. Taw'ääts hë bë h'yy gadeja had'yyt hë P'op Hagä Do wë bë hä tanoo do hyb n'aa. ³Taw'ääts hë ää na-ääj hë bë ky n'aa ets'ëe, P'op Hagä Do tyw n'aa gas'ëes hyb n'aa Kristo ky n'aa pooj jé ji nahapäh do ää baher'oot hyb n'aa. Ta ti ky n'aa hanäm do ÿ ma metëek do hyb n'aa ÿ rawén dawäts geët. ⁴ÿ bë ky n'aa ets'ëe, baad ub, hä ÿ Jesus karën doo da né hë, ta ky n'aa ÿ baher'oot hyb n'aa. ⁵Baad ub, h'yy ganäng doo me bë aboo had'yyt hë Jesus hä h'yy kana'eeh do sa wë. Ta tyw n'aa nyy bä tii da had'yyt hë ÿ karën bë bad'oo. ⁶Taw'ääts hë ky enyym doo gó had'yyt hë bë er'ood ta wób sa sii. Taw'ääts hë baad bë er'ood sa sii, rahyb n'aa newëe hyb n'aa bë her'oot doo. Tii d' bë adoo bä, bë hapäh da nyy da bë ky gadoo bë hä reaanh doo.

Sa wë Paw-Ro mejüü do sa ky n'aa hahÿyÿh

⁷Ër hÿyÿj hadoo do Tikiko häd näng do bë da tamaher'oot sahõnh hë këh ÿ n'aa. Ër hÿyÿj hadoo do ää kamahän do tii. Ää sii baad Kristo wë moo wät do tii. Dooh tah'yy gajëe bä, bë hyb n'aa, Kristo wë tamoo wät doo. ⁸Bë wë ÿ mejüü tabahõm, bë tamaher'oot hyb n'aa nyy da babä ää babok, bë tah'yyb en'yym hyb n'aa na-ääj hë. ⁹Ta sii ÿ mejüü Onesim häd näng doo, bë panang buuj seeh. Ër hÿyÿj hadoo do ää kamahän doo, baad hadoo do hä h'yy kanerét do tii. Sahõnh hë babä ky n'aa bë da ramaher'oot.

Sa hä rahyb n'aa esee do ky n'aa hahÿyÿh

¹⁰Aj'yy Aris-Tako häd näng doo, pa ÿ radawäts geët do bë m' tahyb n'aa esee. Maah-Ko, Béh-Nabéh j'ooch na-ääj hë bë m' tahyb n'aa esee. (Bë ÿ maher'ood wät paa nyy d' bë bad'oo Maah-Ko kajaa bä. Ti hyb n'aa taw'ääts hë baad bë gadoo.) ¹¹Jesus, Jus-To ta häd seeh, ti na-ääj hë bë m' tahyb n'aa esee. Jääm né ti ajyy Judah buuj Jesus hä h'yy ka'eeh doo, si ÿÿ P'op Hagä Do bag'ääs do ky n'aa ma met'ëek doo. Baad ÿ ramasa ÿ rah'yyb en'yym. ¹²Epararas, bë seeh, Kristo Jesus wë moo wät doo, bë m' tahyb n'aa esee. Tak'öp taky n'aa hetsë bë hyb n'aa, baad had'op had'yyt hë bë babok hyb n'aa, baad ub bë bahapäh hyb n'aa na-ääj hë

é 4.5 Tii d' takarën ji bad'oo, ta wób ji h'yyb tatuk hyb n'aa Jesus ky n'aa ragadoo hyb n'aa.

P'op Hagä Do karën do bë hä. ¹³Tak'ëp Epararas hyb n'aa tam'aah bë hyb n'aa, Raw-Diseej panang bä Jesus hä h'yy ka'eeh do sa hyb n'aa na-ããj hë, Ijerap panang buuj Jesus hä h'yy ka'eeh do sa hyb n'aa na-ããj hë. Ý hapäh tii, ý wén j'aa etsë ta hä. ¹⁴Najis ýý, mediko, Rukas häd näng doo, aj'yy Demas häd näng do daheeh ti na-ããj hë né hë m' bë rahyb n'aa esee. ¹⁵Bë maher'ood ër hÿÿj hedoo do Raw-Diseej panang bä haj'eenh do sa hä ý hyb n'aa esee. Bë maher'ood na-ããj hë ýÿnh Nim-Pa häd näng do hä, Jesus hä h'yy ka'eeh do ta tób bä kahet'aa do sa hä na-ããj hë, ý hyb n'aa esee sa hä.

¹⁶Hahÿ bë ý ma erih do bë ner'ood wät do jawén paa bä bë mahang, ý karën bë mejō hōm Jesus hä h'yy ka'eeh do Raw-Diseej panang bä haj'eenh do sa wë, t'ĩ hēnh takaner'oot hyb n'aa. Taw'ããts hë tii bä bë ner'oot na-ããj hë kerih do Raw-Diseej buuj hä ý ma erii wät doo.

¹⁷Hahÿÿ da bë maher'ood këh ýÿ, aj'yy Akipo häd näng do hä: “Taw'ããts hë mabahajaa a hä Tak'ëp Hyb N'aa Jawyk Do anoo do mamoo wät do pan'aa.” Tii d' né da bë kyyh ta hä.

¹⁸Ý Paw-Ro, moh ýÿ me tagadëëg ub ý berii kãn hahÿ bë ý hyb n'aa esee do ky n'aa. Ý karën paawä ý bë ky n'aa ets'ëë ragadahew'ëës doo gó ý bagëët do hyb n'aa. P'op Hagä Do ky enyym da bë hä. Jããm hë kä.